

傳乃欣然曰我固謂必有是也平時愛諸葛孔明靜以修身之語表所居曰靜修至元十九年詔徵入朝擢左贊善大夫以母老固辭俸給一無所受他日復詔之終隱不出

蕭彝尊

處士蕭彝尊先生剡奉元人也初出爲府史語當道不合卽引退力學三十年不干仕進鄉人有暮行遇盜者詭曰我蕭先生也盜驚愕釋去世祖時辟爲陝西儒學提舉不赴後累授集賢直學士改集賢侍讀學士皆不赴無何復拜太子右諭德扶病至京師入覲東宮書酒誥爲獻以朝廷時尙酒也尋又稱病請解職不許俄擢集賢學士國子祭酒依前太子右諭德俱引病

道藏輯要

三丰全集

隱鑑

三

續畢集七
XIII

力辭而歸其友張思廉聞而嘆曰清高自守功名不足以動其心蕭子可謂尙志之士矣

仇山村

逸士仇山村先生遠錢塘人也遯跡江湖博通經史至元中薦爲溧陽教諭轉寶慶路教授不赴又改將仕郎杭州路總管府知事皆辭家錢塘西城下仰屋著書閉門索句或坐花間獨言獨飲嘗聞其閒居十詠真風流自賞之才也今錄二首以見先生隱趣詩曰仰屋著書無筆力閉門索句費心機不如花下冥冥坐靜看蜻蜓蛺蝶飛又曰茶甌紗帽慣迎賓不是詩人卽道人細雨斜風君莫出綠陰門外有紅塵